

Colosenses

Colosa majaräre gojabeoñorã Pablo sã

1 ¹⁻² Yũhũ Pablo Jesu yagũ mari acaweregũ Timoteo mera mũare Colosa majaräre gojabeoa gũa. Jesucristo ãgũ yare buhedoregũ ãgũ apidigũ ta ãhraa yũhũ. Goãmũ ãgũ gamero dopa ta Jesucristo yare ãgũ yare buhebure apimi. Eropirã mũare gũa acawererãre Cristore umupeorãre gojabeoa. Eropirã mari Pagũ Goãmũ mera mũare õadorea. Eropirã ãgũ mera õaro árique mũa.

Jesu yarãre Pablo serēbasapũ Goãmũre

³⁻⁸ Mũa ya áriburire Goãmũre serērã mucubiriri mera eropa serēbasaniguicãa gũa. ãgũ mari Opũ Jesucristo Pagũ ãhrimi. Áriphehrerinũri mũa mũmũsigue õaro áricũ iigũcumi Cristopũ. ãgũ eropa iibu áricũ mũa mucubirimũhtarã waĩcũa. “Jesucristo diaye iigũ ãhrimi,” arĩ ãgũre umupeorã waĩcũa mũa. Eropirã ãgũ yarãre mahi waĩcũa mũa. Mũa eropa árirã áricũ Goãmũre “Õhaa,” arĩ mucubiriri mera serēbasaa gũa. Áriphehreruere Jesu yarã diaye áriiri buherire õari buherire erã werecũ peerã masa õaripũre gohrotoma. Goãmũ yare masinemorã wahama. Õpa ta mũa sãre Epafra õari buherire weredi áriimi. ãgũ gũa mera Cristore mohme coregũ ãhrimi. Iri mohmerire duhubeami ãgũ. Mũare ãgũ eropa werecũ peerã, mata Goãmũ yare õaro iiniguicãmũrayoro mũa. Eropirã Goãmũ mũare mahirire diaye ta masirã mata õaro iiyoro mũa. Mũa eropa iirare ãgũ Epafra weremi gũare. Espiritu Santo itamuri mera Jesu yarãre mũa mahirare weremi ãgũ gũare. ãgũ eropa arĩ werecũ peerã “Õhaa,” arãa gũa Goãmũre.

⁹Eropirã mũare guñarã eropa Goãmũre serēbasaniguicãa. Goãmũ ãgũ gamerire mũa masipehoboro dopa serēbasaa gũa. ãgũ yare õaro masirã mũa áriboro sãre serēbasaa gũa. ¹⁰Õpa ta serēbasaa gũa mari Opũ Cristo ãgũ gamero dopa ta õaro mũa iiburire. Mũa eropa iicũ ãgũ ãgũ mũare sũagũcumi. Eropa ta mũa áriphehrerire õarire mũa iiburire serēbasaa. Goãmũre mũa masinemoboro dopa serēbasaa. ¹¹I sãre serēbasaa gũa. Goãmũ ãgũ õaro turari mera mũa õaro siporã turarã áriboro sãre serēa. Eropa ta serēa ñero tariquererã mũa Goãmũ mera ujujuro bojeboro dopa. Ñero tariquererã mũa eropa pepicãburire mũa mucubiriri mera eropa áriniguiboro sãre serēbasaa daja gũa. ¹²Goãmũ ãgũ yarã áricũ marire iimi. Eropa iigũ ãgũ orire mari opamorã mari

áricũ sãre iimi ãgu. ãgu árirogue ôarogue mari áriBORORE amutuhajami ãgu. ãgu eropa iicũ ãarã mucubiriri mera mari Pagure “Ôhaa,” mũa aríBORORE serêbasaa gũa mũare. ¹³ãgu ta marire peamegue wabonirãre taricũ iidi árimi. Iribojegue ñerire duhumasibiriribũ mari. Ñegupũ marire doredi árinirimi. Eropigu Goãmupũ marire taudi árimi. ãgu magũ ãgu mahigure opũ acugũ ãgu dorero dopa marire áricũ iimi. ¹⁴ãgu magũ mera marire peamegue wabonirãre taudi árimi Goãmũ. ãgu magũ ãgu sírirañe mera mari ñeri iirare cádjidi árimi Goãmũ.

Masa Goãmure gamebircũ ãha Cristo amupũ, arí gojañumi Pablo

¹⁵Goãmure mari Pagure ãaya mara. Cristo ãgu magũ ãgu Pagũ ãgu áricũrĩre ãhmudigũ árimi masare. ãgu ãgu magũ áripehrerã core, áripehreri core árituhadigũ árimi. Eropigu tauro opũ áhrimi ãgu. ¹⁶Goãmũ ãgu dorecũ ãgupũ ãgu Pagũ mera áripehrerĩre ãhacũnuguñumi. Umãsigue áririre i yebague árirĩ sãre ãhacũnuguñumi. Mari ãarire mari ãabiriri sãre ãhacũnuguñumi. I yeba majarãre, umãsi majarã oparãre, áripehrero dorerãre, mari ãarãre, mari ãabirã sãre, áripehrerãre ãhacũnuguñumi. ãgu áripehrerĩre, áripehrerãre ãhacũnuguñumi. Eropirã áripehrerã ãgu iinirã áhrima. Áripehrerĩgue ta ãgu iira áhraa. ¹⁷Áripehrerã core áripehreri core Cristo árimũhtañumi. Eropiro ãgu turari mera áripehrerã dohpaguere árirã iima. Áripehreri sã áriro iiaa. ¹⁸Mari ãgu yarã áripehrerã ãgu ya curu majarã árirã ãgu dupũ waicua. Eropigu ãgupũ mari dipuru áhrimi. ãgu sírigũ masa mãmiamũhtadigũ árimi áripehreri weca áripehrerã weca áribũ. ¹⁹Cristo mari Pagũ Goãmũ mera yuju dupũ ta áriro dopa ta áhrimi. ãgu eropa áricũ ta gamepũ mari Pagupũ. ²⁰Áripehrerã masa erã ãgure gamebirimãricũ ãagu erã ãgu mera amubure Cristore obeopũ. ãgure eropa obeogũ ãgu Cristo crusague síri ãgu di cóãra mera amupũ. Eropigu umãsi majarãre, i yeba majarã sãre ãgu mera ôaro áricũ iipũ. Umãsi maja i yeba árirĩ sã ôaro áricũ iipũ. Eropigu ãgu guñadiro dopa iipũ.

²¹Mũa sãre eropa ta ãgu mera ôaro áricũ iidi árimi. Mũa sã ñerire iiniguinirã Goãmure boje majarã árirã mũa pepiri mera ãgure gamebirinirã árimãmĩribũ. ²²Mũa eropa árinirãre Cristo síriro mera ãgu Pagure mũa ãgu mera ôaro wacũ iipũ ãgu. Eropa iipũ ãgu mũa ãgu yarã ôarã ñeri marirã, dipuwaja marirã mũa áriboro dopa. Mũa eropa áricũ ãgu áriroguere mũa áriborore eropa iipũ. ²³Eropa ta iigucumi ãgu mũa ãgure duhuro mariro umupeoturaniguiicãcũ. Mũa ôari buherire mũa Goãmũ mera áriniguiborore mũa cádjibiricũ, ãgu mera mũa áricũ iigucumi mũare. Iri mũa peera buherire ôari buherire áripehrerã i yeba majarã peenirã árima. Eropigu yuhũ Pablo sã iri ôari buherire weregũ ta áhraa.

Jesu yarãre itamubure apipũ Goãmũ Pablöre

²⁴Cristo mari ãgu yarã áriborore crusague sírigũ ñero taripũ. Eropigu yũ sã mũa ãgu yarã áriburire ñero tarigũ mucubiria. Eropa ñero tarigũ Cristo marire ãgu apirare ii ojogorocũgu iiaa. Eropigu mucubiria. Cristo yare mari iira dipuwaja mari ñero tarinemoboro duhyania dohpa. Eropigu ãgure mũa guñaturaborore

ñero tari mucubiria yũhũ. Īgũ dũpũ iro dopa árĩrã ĩgũ ya curu majarã áhrra mũa. ²⁵Jesu yarãre itamubure apimi Goãmũ yũre. Mũa ya árĩburire iibure yũre apimi ĩgũ. Īgũ yare muare werepehobure apimi ĩgũ yũre. ²⁶Iri ĩgũ yare iribojegure baja cururi majarãre erã masipehocũ iibirimũriĩumi mari Pagũ. Dohpague dohpague majarãre ĩgũ yarãre irire õaro masipehocũ iimi pare. ²⁷Eropigũ “Judio masa árĩbirã sãre yaha buheri õataria,” arĩ ĩgũ yarãre irire weremi. Iribojegue erã masibirirare weremi Goãmũ. Ōpa áhrra dohpague ĩgũ werera: Cristo ĩgũ yarã mera áhrimi. Īgũ eropa árĩcũ ĩgũ yarã mũsiguere õatariaroguerẽ árĩrãcoma. Iri áhrra iribojegue erã masibirira mari Pagũ ya.

²⁸Cristore ta werea. Árĩpehrerãre gũisãgũ erãre werea yũhũ. Ōaro masiri mera buhea yũhũ õaro Cristore masare masicũ iibu. Eropa buhea yũhũ erã ĩgũ yare õaro iirã erã árĩcũ iibu. ²⁹Iri ta áhrra yũ mohmeri. Jesucristo ĩgũ ya turari mera yũre ĩgũ ora turari mera turaro mohmea yũhũ ĩgũ yare buhegũ.

2 ¹Ire mũa masicũ gahmea. Mũa ya árĩburire, Laodicea majarã ya árĩburire, árĩpehrerã ya árĩburire turaro mohmea yũhũ. Árĩpehrerã masa yũre ĩabirã ya árĩburi sãre turaro mohmea yũhũ. ²Ōpa ta mohmea yũhũ mũa árĩpehrerã õaro siporãcuborore. Mũa mera majarãre mũa yujuro mera game umupeoburi sãre eropa mohmea yũhũ. Iribojegue majarãre Goãmũ werebirira Cristore masicũ iiri áhrra. Īgũ yare masirã Cristore umupeoa mũa. Mũa ĩgũre õaro masiborore mũa ĩgũ mera õaro árĩborore bũrigã itamua yũhũ muare. ³Cristo dihta masipehocãmi gajirã masibirirare. Īgũ árĩpehrerẽre õaro masigũ áhrimi. Īgũ masiri õatariaro áhrra. ⁴Iri werea muare gajirã muare peesũari werenigũiri mera gũyari arĩgũ. ⁵Yũhũ mũa watope árĩbiriqueregũ yũ guñari mera mũa watope arĩgũ dopa áhrra. Erogue árĩbiriqueregũ Cristore mũa õaro umupeoniguirare mũa õaro iirare peegũ mucubiria yũhũ.

⁶Eropirã mari Opũ Jesucristore opamorã ĩgũre mũa umupeonũgadiro dopa ta umupeonigũicãque. “Eropa ta yũre itamugũcumi,” arĩrã mũri nũcũ ĩgũ mera õaro arĩnigũicãque. ⁷Īgũre õaro masirã árĩque mũa. Eropirã mũri nũcũ ĩgũre masinemoque gajirã erã ero core muare erã buhediro dopa ta. Eropirã Cristore mucubirã “Ōhaa,” arĩnigũicãrã árĩque mũa.

Cristo yarã árĩrã õaripũre gohrotoa mari, arĩ gojañumi Pablo

⁸⁻¹⁰Ōaro pee masique mũa. Masa erã gamero erã buherire erã gũyari peebiricãque. Erã iribojegue majarã árĩricũrãre buhema. Masa erã pepiro dopa pepirã árĩrã i doreri dihta buhema. Cristo yapũre buhebeama. Cristo mari Pagũ árĩro dopa ta arĩgũ Goãmũ gohra ta áhrimi. Eropigũ Jesucristo Goãmũ arĩgũ i yebague masa dehyoadigũ Goãmũ ta árĩmi. Eropirã ĩgũ yarã árĩrã Goãmũ mera õaro arĩnigũia mari. Īgũ ta árĩpehrerã deyobirã oparã tauro opũ arĩgũ áhrimi. Mũsi majarãre i yeba majarãre árĩpehrero majarãre doremi. Eropirã gũyari buherãre peebiricãque. ¹¹Eropirã Cristo yarã árĩrã circunciõnre

iinirã gasiro merogã wiri aĩnirã iro dopa árĩrã àhraa mua. Masa erã dupure merogã gasirogãre erã wiri cõaro árĩbiriya. Mua pepiripure Cristopũ mua ñeri uaribejarire cõami. ¹² Ìgu yarã árĩra puhru waĩyesũnirã árĩnirã árĩbu mua. Eropa waĩyesũnirã árĩrã õpa ìhmurã iinirã árĩbu mua: Iribojegue mua ñero iirare duhurare ìhmurã iibu mua. Jesucristo sĩridigũ mera mua uaribejarare cõanirã árĩbu mua. Eropirã Jesucristo sĩridigũ masa muriara mera õaripure gohrotonirã árĩbu mua. Ìgu Goãmũpũ Cristore masudigũ árĩmi. “Ìgu turagũ àhrimi,” arĩrã ìgure umupeorã árĩrã õaripure gohrotonirã árĩbu mua. ¹³ Iribojegue mua ñerã árĩra dipuwaja peamegue wabonirã árĩriyoro mua. Eropa wabonirã árĩriyoro mua Goãmũ yarã árĩbirã. Ìgu dorerire opabirã árĩriyoro mua. Dohpaguere mari Pagũ marire ìgu mera eropa õaro árĩniguimorã iimi. Cristo ìgu sĩridiro mera eropa iimi ìgu marire. Eropa iigu mari árĩpehreri ñeri iirare cãdijicãdi árĩmi ìgu. ¹⁴ Goãmũ ìgu dorerire gojarare mari tarinũganirã mari árĩquerecũ ta ìgu marire dipuwajacũdorebeami. Cristo crusague ìgu sĩridiro mera Goãmũpũ mari ñeri dipuwajare cãdijipehocãdi árĩmi. ¹⁵ Ìgu Cristo crusague sĩricũ watẽa ya dorerapure Goãmũpũ tarinũgacãpũ. Eropirã bu árĩrã dujacãnorã erã watẽapũ. Eropa iigu erãre guhyasiuro wacũ iipũ erã ìhuro.

Umusi majare Goãmũ yare gameque, arĩ gojañumi Pablo

¹⁶ Eropirã gajirã erã dorerire dorediaricoma muare. “Muare irire barã, irire ihrirã ñerire iirã iiaa mua,” arĩ werewuama muare. Erã eropa arĩ werewuacũ eropa ìacãque erãre. Bojori nũcũ árĩrinũri, aberi nũcũ árĩrinũri, semanari nũcũ árĩrinũri, bosenũri mua iidiabiricũ werewuama. Erã eropa werewuacũ eropa pepicãque erãre. ¹⁷ Erã muare doreri iri bojegue Goãmũ apira doreri Jesucristo mari ñeri iira dipuwaja sĩriburire ìhmumũhtarãne árĩyoro. Dohpaguere Cristo arĩmi marire. Eropirã ìgure umupeorã iri doreripure umupeobea pare. ¹⁸ Erã dorerire iidorerã muare dipuwajacũrã dujacũ iidiama erã. Erã eropiciũ eropa ìacãque erãre. “Gajiropa dehyoarire ìabu guã,” arĩmaacãrã erã anyuare umupeorima Goãmũre umupeoboro dopa. Erã eropa pepicãrã iro dopa iirima. Gajirã masa iro dopa erã ñeri uaribejarire pepirima erã. Eropa pepirã árĩrã “Masipehocãa guã,” arĩ pepirima erã. ¹⁹ Eropa iirã árĩrã Cristopũre umupeobeama. Cristo dihta ìgu yarãre doregu àhrimi. Cristopũ mari ìgu yarã dipuru àhrimi. Ìgu yarãpũ ìgu ya curu majarã árĩrã ìgu dupũ waĩcua. Mari dipuru mari dupure gamesũriro dopa ta àhrimi Jesucristo ìgu yarãre. Ìgu yarãre itamugũ marire ìgure umupeonemocũ iimi. Goãmũ gamero dopa ta ìgu yarãre ìgure masinemocũ iimi. ²⁰ Marire ñero iira dipuwajacũnirãre Cristo taudigũ árĩmi crusague sĩrigũ. Eropirã Cristore umupeorã ìgu yarã àhraa. Mua eropa árĩrã i yeba maja buherire anyuare umupeori buherire gamebiro gahmea muare. ¿Duhpirã gajino buherã erã dorerire iidari mua? ²¹ Òpa arĩ dorema erã basi erã gamero: “Irinore babiricãque. Irinore pẽhrebiricãque,” arĩma. ¿Erã eropa arĩdorecũ duhpirã yũhriri mua? ²² Erã doreriñe bari iro dopa ta pehrea waroca. Erã doreriñe i umũ maja dihta àhraa. Masa erã suaro erã buheri dihta àhraa i

buheri. Eropiro duhpiburi áríbeaa. ²³Erã dorerire iirã Goãmure umupeorã iro dopa árírima. Eropirã eropa pepicãrã iro dopa ii íhmuma. Erã dũpũre ñero taricũ iirã “Goãmure umupeorã iiaa,” arírima. Erã eropa iirã erã doreripũ masipehorã ya doreri iro dopa iirima. Eropa áríbeaa. Erã dorerire iiquererã erã ñeri ñaribejarire duhubeama. Eropiro erã doreripũ duhpiburi áríbeaa.

3 ¹Eropirã Cristo yarã áhraa mũa. Eropirã mũa ero core mũa ñeri iirare duhunijarã õaripũre gohrotonirã áhraa mũa. Eropa gohrotoã áríã ñmũsi majare Cristo yare gameque mũa. Erogue Cristo ígu Pagũ diayepũ doagu árípehrerore doregũ áhrimi. ²⁻³Mũa ñaribejari cõánirã áríã Cristo gamerire opaa. Ígu Cristo mũa õaro iiborore õaro íhadibumi. Eropirã iri ñerire guñabeaa mũa. Eropirã ñmũsi majare Goãmũ yare guñamũltaque. I yeba majare guñaniguibiricãque. ⁴Eropirã ñmũsigue Cristo marire eropa áriniguimorãre aígũ ígu aricũ ígu mera warãca. Eropa warã ígu mera ñmũsigue Goãmũ yare oparãca.

Cristo yarã áríbirã ñerire iiribũ mari, arí gojañumi Pablo

⁵Eropi i yeba maja ñerire duhcãque. Ne yujugũ mojoto diribiriqueregũ nomeo mera áríbiricãque. Ne yujugo mojoto diribiriquerego ñmũa mera áríbiricãque. Eropa ñeri mũa iirire iripẽta duhcãque. Ñeri ñaribejarire iibiricãque. Mũa opaburire gajinore gametaribiricãque. Mari gajinore bũrigã gamerã goãmarã wéanirãre erã umupeoro dopa iirã iiaa mari irire. ⁶Iri ñerire iirã Goãmure tarinũgarã áhrima. Erã eropa áricũ íagu ígũpũ erãre gamebeami. Eropigũ erãre bũrigã dipuwaja moagũcumi. ⁷Iribojeguere mũapũ iri ñerire iinirã mera majarã áríriya mũa. ⁸Dohpaguere i ñerire duhupehrecãque mũa. Guarire, disitĩri wiarire, gajirãre ñero arí pepirire, gajirãre ñero quere wereniguirire, ñero wereniguirire iri árípehrerire duhcãque. ⁹⁻¹⁰Mũapũ Jesu yarã warã ñerã mũa árdiro dopa ta iri ñeri ñaribejarire duhutihajanirã áríbu. Eropirã õaripũre gohrotonirã áhraa mũa. Mũare õaripũre gamecũ iigu iimi Goãmũ. Ígu áríro dopa mũa áríboro dopa eropa iimi. Eropa ta iimi ígu mũa ígũre õaro masiboro dopa. Eropirã ígu eropiicũ mũa mera majarãre gũyabiricãque. ¹¹Cristo yarã mũa áríã judio masa, judio masa áríbirã sã yujuropa dihta áhraa mũa Goãmũ ígu íacũ. Gasiro merogã wiri aínirã, irire aibirinirã sã Cristo yarã áríã yujuropa áhraa Goãmũ ígu íacũ. Gaji yeba majarã sã, masibirã sã, mũa ya yeba majarã sã Cristo yarã áríã yujuropa áhraa Goãmũ ígu íacũ. Pohro majarã, erã pohro majarã áríbirã sã, Cristo yarã áríã yujuropa ta áhrima Goãmũ ígu íacũ. Jesucristo tamera árípehrerã ígu yarã mera áhrimi. Ígu yarã erã íacũ bu árígu áríbeami ígu.

¹²⁻¹³Eropi Goãmũ ígu beyenirã, õarã, ígu mahirã áríã õpa áríque mũa: Gajirãremojomoro íarã, gajirãre õaro iirã áríro gahmea. Mũare ñero iiquerecũ ta eropa pepicãrã áríro gahmea mũare. Mũa mera majarã mera guarã, erãre quere iirã áríbiricãro gahmea mũare. Eropirã “Yũhũ bu árígu áhraa,” arí pepique. Mari Opũ mũa ñeri iirare cãdijimi. Ígu eropa cãdijidiro dopa ta mũa sã mũa mera majarã erã ñero iirare cãdijique. ¹⁴I doreri tauro õpa arí dorea mũare: Gajirãre mahi umupeoque. Mũa eropa iirã árípehrerã gajirã mera yujuro mera árírãca.

¹⁵ Cristo marire òaro áricũ iimi gajinore mari wereniguibiriboro dopa. Ìgũ eropa iicũ òaro árique mũa. Mari ìgũ yarã yuju curu ta àhraa. Mari eropa árířäre mari Pagũ marire òaro ářimoräre ta apimi. Ìgũ eropa iicũ òaro árique mũa mũa basi. Eropirã Goãmũre “Òhaa,” arĩ mucubirĩ árique mũa Goãmũ mera.

¹⁶ Cristo ya buherire òaro guñaniguicãque mũa. Òaro pee masiri mera ìgũ yare gajiräre buheque. Guhyadiaro irire wereque. Eropirã Salmo gojaripũre, Goãmũ yare bayarire, gaji ìgũre umupeori bayarire ìgũre bayapeoque. Òaro guña umupeori mera bayapeoque. Eropa bayarã ìgũ yare òaro guñaque mũa. Eropirã Goãmũre “Òhaa,” arĩ mucubirĩ árique mũa Goãmũ mera.

¹⁷ Ářipehreri mũa iirire òaro siporãcũ iique mari Opũ Jesu ìgũ mucubiriboro dopa. Mũa wereniguirã ìgũ ya áriburi dihtare wereniguique. Eropirã Cristo ìgũ itamuri mera Goãmũ mari Pagũre serērã “Òhaa,” arĩ mucubirique ìgũre.

Jesu yaräre yujuro mera áriburi doreri òpa àhraa, arĩ gojañumi Pablo

¹⁸ Mũa marapũcũrã nome, mũa marapũ sũmaräre òaro yũhrique. Eropa ta iiro gahmea mari Opũ yarã Cristo yarã nome ářirã. ¹⁹ Mũa marapocũrã, mũa marasã nomere mahi umupeoque. Igore turibiricãque. ²⁰ Mũa erã porã sã mũa pagũ sũmaräre tarinũgabirã dihta árique. Mũa eropa iicũ ìagũ mari Opũ òaro sũagũ ářigũcumi. ²¹ Mũa erã pagũ sũmarã sã mũa poräre eropa turiniguibiricãque bujawerecũ iiri arĩrã. ²² Mũa pohro majarã, mũa oparäre i yeba ářiräre eropa yũhrirã árique. Erã ìhurore erã dorero dopa ta mohmeque. Erã maricũ sãre mohmeque. Mari Opũre Cristore guhyadiaro mũa ìadiro dopa ta òaro mera yũhrique mũa oparã sãre. ²³ Diaye ta Cristo yarã ářirã òaro yũhrirã àhraa mũa ìgũre. Eropirã mũa oparäre ò majarã sãre yũhrirã, Cristore mũa yũhriro dopa ta yũhrique mũa. Eropirã mũa oparã erã dorero dopa ta turaro mera mohmeque “Cristo ya doreri àhraa,” arĩrã. ²⁴ Mũa eropa iicũ Cristo mũare wajayegũcumi. Mũare ìgũ oburire mũare ogũcumi mari Opũ. Irire masia mũa. Mari Opũ Cristo ìgũ pohro majarã àhraa mũa. Eropigũ ìgũpũ mũa Opũ gohra àhrimi. ²⁵ Ìgũre tarinũgaräre dipuwaja moagũcumi mari Opũpũ. Ářipehrerã tarinũgaräre ne yujugũ duhyaro mariro yujuro mera dipuwaja moagũcumi ìgũ. Eropa yũre iiri arĩrã òaro yũhrique mũa.

4 ¹ Mũa oparãpũ, mũa pohro majaräre diaye ta òaro iique eräre. Mũa sã opũ opaa. Mũa opũpũ mũsi majagũ Goãmũ àhrimi.

² Mũa ářipehrerã mũmri nũcũ Goãmũre serënguique. Òaro guña pee masi serënguique. Eropirã mari Pagũ òaro iirare guñaque. ³⁻⁴ Gũa ya ářiburipũre serëque daja. Cristo yare iribojegue majarã erã masibirirare buherã iiaa gũa. Masare gũa òaro buheboru dopa serëbasaque mari Pagũre. Yũhũ Goãmũ yare wereniguiiri waja dohpaguere peresugue àhraa. Eropigũ mũa eropa serëcũ gahmea ìgũ yare yũ òaro iiboro dopa. Cristo ìgũ dorediro dopa ta yũ wereburire serëque.

⁵ Jesu yarã ářibirã mera ářirã òaro iique mũa. Cristo yare wereque eräre. Erã mera mũa ářiropë ta eropa ta òaro iique erã Jesu yarã ářiboro dopa. ⁶ Gajirã mera weretamurã òaro sũaro mera weretamuque. Òari

dihtare wereniguique. M̄ua eropiirã gajirã erã Jesucristo yare m̄uare serēpicũ õaro masiri mera yũhrirãca erãre.

Õadoretup̄ Pablo

⁷Tĩquico mari acaweregu Jesu yagu ãhrimi. Ñgu yu árĩricũrire m̄uare weregũcumi. Ñgu mari mahigu ãhrimi. Cristo yare buhegu, gũa mera mohmegũ ãhrimi. Ne iri mohmerire duhubeami ñgu. ⁸M̄ua pohroque ñgure obeogu iiaa yũhu gũa árĩricũrire m̄ua masiboro dopa. Ñgure obeogu iiaa yũhu m̄uare mucubiricũ iibure. ⁹Onésimo mari acaweregu mera wapimoa obeogu iiaa. Ñgu sã Cristo yare ne duhubeami. M̄ua mera majagu ãhrimi. Erã perã yũ dohpa tarirare wererãcoma m̄uare.

¹⁰Aristarco peresugue árĩgu yũ mera majagu m̄uare õadoremi. Marco sã õadoremi. Ñgu Bernabé pagũ magũ ãhrimi. M̄ua pohroque ñgu ejacũ õaro mera ñgure bocatĩrique yũ m̄uare werebeodiro dopa ta. ¹¹Jesu waĩcũgu “Justo,” erã arĩ piyugu õadoremi ñgu sã. Oã ta yũ mera mohmerã judio masa gohra ãhrima. Judio masa gohra erã dihta Goãmũ yare yũ mera buhema. Õpa buhea gũa Goãmũ yarã masa waboro dopa. “Jesucristo yũ Opũ ãhrimi,” erã arĩboro dopa buhea gũa. Erã yũre õaro itamunirã ãhrima. ¹²Epafrã m̄ua mera árĩdigũ m̄uare õadoremi. Ñgu Jesucristo dorerire õaro iigu ãhrimi. Goãmũre serēgu, turaro m̄ua ya árĩburire serēbasaniguicãmi ñgu. Goãmũre õaro guñaturaniguimorãre, ñgu gamero dopa iimorã m̄ua árĩboro dopa eropa Goãmũre serēbasaniguicãmi ñgu. ¹³Ñgu m̄ua ya árĩburire turaro serēbasami. Laodicea majarã ya árĩburire, Hierapoli majarã ya árĩburi sãre ñgu turaro serēbasami. Ñgu eropa iigu árĩcũ ñagu m̄uare weregũ iiaa. ¹⁴Duhturu Luca waĩcũgu mari mahigu m̄uare õadoremi. Demã sã õadoremi.

¹⁵Õaporo mari acawererã Laodicea majarã. Nĩfa sã õaporo. Jesu yarã igo pohro gamenererã sã õaporo. ¹⁶Ipũre yũ gojabeorapũre buhetuha Laodicea majarã sãre obeoque. Eropirã erãre Laodicea majarãre yũ gojabeorapũre m̄ua sã buheque. ¹⁷Eropirã õpa arĩque Arquĩpore: “Mari Opũ Jesu yagu m̄u árĩcũ ñgu mohmerire apidi árĩmi m̄ure. Ñgu eropa apicũ iri mohmerire õaro mohme ojogorocũque m̄hũ,” arĩque ñgure.

¹⁸Yũhu Pablo, yũ mojoto mera ire gojaa. M̄uare õadorea yũhu. Peresugue yũ árĩrĩre guña serēbasaque Goãmũre. Õaro árĩque m̄ua. Goãmũ ñgu mahiri mera m̄uare õadorea. Iripẽta ãhraa.